



I archeoligs subacuis dal projet "Anaxum", rivât al tierç an di ativitât e là che a partecipin students e laureâts talians, americans e todescs, a àn recuperât dal flum plui di 400 tra anfuris, monedis, ceramichis e altris reperts.

Il "tesaur" roman intai fonts dal Stele

Plui di 400 reperts di ete romane, tra anfuris, monedis, ceramichis comunis e preeadis, contignidôrs, plats, fibulis, clâfs, modons bolâts, a son stâts scuvierts intai fonts dal flum Stele de mission di archeologie subacue "Anaxum", puartade indevant de Universitât dal Friûl in colaborazion cu la Sorintendence pai bens archeologjics dal Friûl - VJ. La cjatade e je sucedude dilunc de tierce campagne di ricercjis inte plui impuartante arterie di risultivis dal Friûl.

Anaxum (il non latin antic dal Stele) al è l'unic projet e cantîr di archeologie fluviâl in Italie, là che chest an a àn partecipât une doze di students e laureâts che a vegnin di universitâts talianis, todescjis e americanis. I reperts recuperâts, contant ancje i modons, a rivin a cuasi dôs toneladis e a costituivin almancl in part la cjame dal Stele 1, il natant roman che il so relit al è intal jet dal flum, in comun dal Palaçûl.

I risultâts des ricercjis a son stâts presentâts a Palaç Belgrât a Udin, in presince, pe Universitât dal Friûl, dal coordenadôr dal projet Anaxum, Massimo Capulli, e de coordinadore dal cors di lauree in Sciencis e tecnicis dal turisim culturâl, Simo-
neta Minguzzi; dal Sorintendent pai bens archeologjics dal Friûl-VJ, Luigi Fozzatti; dal vicepresidente de Provincie di Udin, Franco Mattiussi, e dai sindics e rappresentants di comuns dal ba-

cin dal Stele, che al cjape dentri Bertiûl, Maran, Palaçûl, Pucinie, Prissinins, Rivignan, Talmassons, Teôr e Vildivar.

intal stes timp a son partidis oficialmentri ancje lis azions di promozion pe istituzion di un gnûf parc ecostoric dal Stele, il prin intal so gjenar in Italie, che al tocjarà prin di dut i Comuns dal bacin dal flum. L'obietif al è tutelâ, conservâ e valorizâ il patrimoni archeologic, naturalistic ambientâl, storic e socioantropic che al gravite ator de aree umide dal Stele. Al è un projet integrât di gjenar teritoriali, che al cjaparà dentri i stes abitants, cu lis carateristicis previodudis des normis plui resintis su la costituzion di parcs archeologjics.

La campagne di sgjâfs 2013 dal

projet Anaxum, diret di Massimo Capulli, e je durade siet setemans e si è concentrade sul sit dal Stele 1. In chest toc di flum, cjapât dentri tra il margjin çamp



e il centri dal jet par une lungjece di plui o mancul 60 metris, si cjatin di fat trê diversis evidencis archeologjichis: une struture di len lungje plui o mancul 6 metris, di funzion no cognosude; i resej dal relit Stele 1 e une largje aree di dispersion di reperts, dome in part in relacion cul relit. Il lavôr cumò al va in-

devant intai laboratoris dal dipartiment di Storie e tutele dai bens culturâi dulà che al è scomençât il studi dai passe 400 reperts cjatâts.

Ancje chest an al team di ricercjis a àn partecipât students e laureâts, plui di une doze de zovins, che a vegnin des universitâts di Udin, Texas A&M (Stâts Unîts), consorziade cul projet Anaxum, e ancje di Kiel (Gjermanie), Padue e Pise. Il projet di fat al è dedicât ancje ae didattiche, permetint ai students di miôrâ lis capacitâts subacuis e di capî la planificazion des ativitâts e l'ûs e la funzionalitât di cierts struments bogns pal sgjâf, tant che la sorbone (strument par aspirâ i sediments) e la lance a aghe.

Chest an cun di plui il grup di lavôr al à preparât, in colaborazion cul Comun di Palaçûl, la mostre "SottoSopra - L'archeologia del fiume Stella in mostra", che si è sierade ai 8 di Setembar.